

RIALACHÁN CUR CHUN FEIDHME (AE) 2023/1174 ÓN gCOIMISIÚN
an 15 Meitheamh 2023

lena leasaítear Rialachán Cur Chun Feidhme (AE) 2018/2019 a mhéid a bhaineann le plandaí
***Crataegus monogyna* le haghaidh plandú de thionscnamh na Ríochta Aontaithe**

TÁ AN COIMISIÚN EORPACH,

Ag féachaint don Chonradh ar Fheidhmiú an Aontais Eorpaigh,

Ag féachaint do Rialachán (AE) 2016/2031 ó Pharlaimint na hEorpa agus ón gComhairle an 26 Deireadh Fómhair 2016 maidir le bearta cosantacha i gcoinne lotnaidí plandaí, lena leasaítear Rialachán (AE) Uimh. 228/2013, (AE) Uimh. 652/2014 agus (AE) Uimh. 1143/2014 ó Pharlaimint na hEorpa agus ón gComhairle agus lena n-aisghairtear Treoracha 69/464/CEE, 74/647/CEE, 93/85/CEE, 98/57/CE, 2000/29/CE, 2006/91/CE agus 2007/33/CE ón gComhairle ⁽¹⁾, agus go háirithe Airteagal 42(4), an chéad fhomhír de,

De bharr an mhéid seo a leanas:

- (1) Le Rialachán Cur Chun Feidhme (AE) 2018/2019 ón gCoimisiún ⁽²⁾ bunaítear, ar bhonn réamh-mheasúnú riosca, liosta plandaí, táirgí plandaí agus réad eile a mbaineann ardriosca leo.
- (2) Tar éis réamh-mheasúnú a dhéanamh, liostaíodh 34 ghéineas agus speiceas amháin de phlandaí le haghaidh plandú de thionscnamh tríú tíortha go sealadach i Rialachán Cur Chun Feidhme (AE) 2018/2019 mar phlandaí a mbaineann ardriosca leo. Áirítear an géineas *Crataegus* L. ar an liosta sin.
- (3) An 3 Bealtaine 2022, chuir an Ríocht Aontaithe ⁽³⁾ iarraidh faoi bhráid an Choimisiúin maidir le plandaí *Crataegus monogynale* haghaidh plandú atá suanach, fréamhlom agus saor ó dhuilleoga agus atá suas le 7 mbliana d'aois agus a bhfuil trastomhas uasta 6,5 cm acu ag bun an ghais, agus plandaí *Crataegus monogyna* le haghaidh plandú agus iad i ndamhna fáis atá suas le 15 bliana d'aois agus a bhfuil trastomhas 13 cm ar a mhéad acu ag bun an ghais ('na plandaí ábhartha') a onnmhairiú isteach an Aontas. Cuireadh an sainchomhad teicniúil ábhartha isteach leis an iarraidh sin.
- (4) An 30 Márta 2023, ghlac an tÚdarás Eorpach um Shábháilteacht Bia ('an tÚdarás') tuairim eolaíoch maidir leis an measúnú riosca ar na plandaí ábhartha de thionscnamh na Ríochta Aontaithe ⁽⁴⁾. Shainiaithin sé *Erwinia amylovora* mar an lotnaid a bhaineann leis na plandaí sin.
- (5) A mhéid a bhaineann le *Erwinia amylovora*, rinne an tÚdarás meastóireacht féachaint an gcomhlíontar na ceanglais speisialta maidir le plandaí *Crataegus* L., seachas torthaí agus síolta, a thabhairt isteach sna criosanna cosanta sonraithe agus maidir lena ngluaiseacht laistigh de na criosanna sin, criosanna a liostaítear i bpointe 9 d'Iarscríbhinn X a ghabhann le Rialachán Cur Chun Feidhme (AE) 2019/2072 ón gCoimisiún ⁽⁵⁾.
- (6) Ar bhonn na tuairime sin, meastar an riosca fiteashláintíochta a eascraíonn as tabhairt isteach na bplandaí ábhartha ón Ríocht Aontaithe i gcríoch an Aontais a bheith laghdaithe go leibhéal inghlactha.

⁽¹⁾ IO L 317, 23.11.2016, lch. 4.

⁽²⁾ Rialachán Cur Chun Feidhme (AE) 2018/2019 ón gCoimisiún an 18 Nollaig 2018 lena mbunaítear liosta sealadach plandaí, táirgí plandaí agus réad eile a mbaineann ardriosca leo de réir bhrí Airteagal 42 de Rialachán (AE) 2016/2031 agus liosta plandaí nach bhfuil deimhnithe fiteashláintíochta ag teastáil ina leith lena dtabhairt isteach san Aontas, de réir bhrí Airteagal 73 den Rialachán sin (IO L 323, 19.12.2018, lch. 10).

⁽³⁾ I gcomhréir leis an gComhaontú maidir le Ríocht Aontaithe na Breataine Móire agus Thuaisceart Éireann a bheith ag tarraingt siar as an Aontas Eorpach agus as an gComhphobal Eorpach do Fhuinneamh Adamhach, agus go háirithe Airteagal 5(4) den Phrótocal maidir le hÉirinn/Tuaisceart Éireann i gcomhar le hIarscríbhinn 2 a ghabhann leis an bPrótocal sin, chun críocha an ghnímh seo, ní bhaineann tagairtí don Ríocht Aontaithe le Tuaisceart Éireann.

⁽⁴⁾ Painéal EFSA PLH (Painéal EFSA maidir le Sláinte Plandaí), 2023. *Scientific Opinion on the commodity risk assessment of Crataegus monogyna plants from the UK* [Tuairim Eolaíoch maidir leis an measúnú riosca tráchtarraí ar phlandaí *Crataegus monogyna* ón Ríocht Aontaithe]. EFSA Journal [Iris EFSA] 2023;21(4):8003.

⁽⁵⁾ Rialachán Cur Chun Feidhme (AE) 2019/2072 ón gCoimisiún an 28 Samhain 2019 lena mbunaítear coinníollacha aonfhoirmeacha maidir le cur chun feidhme Rialachán (AE) 2016/2031 ó Pharlaimint na hEorpa agus ón gComhairle, a mhéid a bhaineann le bearta cosanta i gcoinne lotnaidí plandaí, agus lena n-aisghairtear Rialachán (CE) Uimh. 690/2008 ón gCoimisiún agus lena leasaítear Rialachán Cur Chun Feidhme (AE) 2018/2019 ón gCoimisiún (IO L 319, 10.12.2019, lch. 1).

- (7) Maidir leis na plandaí ábhartha atá suas le 7 mbliana d'aois agus fréamhlom, mar a áirítear sa sainchomhad a chuir an Ríocht Aontaithe isteach, tá riosca fiteashláintíochta níos ísle ag baint leo de bharr a sainréithe. Dá bhrí sin, níor cheart a mheas a thuilleadh gur plandaí a mbaineann ardriosca leo iad na plandaí ábhartha uile atá suas le 15 bliana d'aois agus a bhfuil trastomhas uasta 13 cm acu ag bun an ghais, ar plandaí de thionscnamh na Ríochta Aontaithe iad.
- (8) Dá bhrí sin, na plandaí ábhartha uile atá suas le 15 bliana d'aois agus a bhfuil trastomhas uasta 13 cm acu ag bun an ghais, ar plandaí de thionscnamh na Ríochta Aontaithe iad, ba cheart iad a bhaint den liosta plandaí, táirgí plandaí agus réad eile a mbaineann ardriosca leo san Iarscríbhinn a ghabhann le Rialachán Cur Chun Feidhme (AE) 2018/2019.
- (9) Dá bhrí sin, ba cheart Rialachán Cur Chun Feidhme (AE) 2018/2019 a leasú dá réir.
- (10) Tá na bearta dá bhforáiltear sa Rialachán seo i gcomhréir leis an tuairim ón mBuanchoiste um Plandaí, Ainmhithe, Bia agus Beatha,

TAR ÉIS AN RIALACHÁN SEO A GHLACADH:

Airteagal 1

Leasaítear an Iarscríbhinn a ghabhann le Rialachán Cur Chun Feidhme (AE) 2018/2019 i gcomhréir leis an Iarscríbhinn a ghabhann leis an Rialachán seo.

Airteagal 2

Tiocfaidh an Rialachán seo i bhfeidhm an tríú lá tar éis lá a fhoilsithe in *Iris Oifigiúil an Aontais Eorpaigh*.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil, an 15 Meitheamh 2023.

Thar ceann an Choimisiúin
An tUachtarán
Ursula VON DER LEYEN

IARSCRÍBHINN

San Iarscríbhinn a ghabhann le Rialachán Cur Chun Feidhme (AE) 2018/2019, sa tábla i bpointe 1, sa dara colún 'Tuairisc', cuirtear an méid seo a leanas in ionad na hiontrála 'Crataegus L.':

'Crataegus L., seachas plandaí *Crataegus monogyna* le haghaidh plandú atá suas le 15 bliana d'aois agus a bhfuil trastomhas uasta 13 cm acu ag bun an ghais, ar plandaí de thionscnamh na Ríochta Aontaithe iad.'
